

新纂雲南通志卷一百九十四目錄

列傳六

明

文祖堯

陶珽雷躍龍

趙炳龍高應雷

陳佐才

武恬康誥

郝太極

孫興可童繆甲

釋普荷讀徹

新纂雲南通志卷一百九十四

列傳六

明

文祖堯傳

文祖堯字心傳號介石晚號日月外史呈貢人也系出宋信國公明洪武時曰龍者隨沐昭靖帥入滇以軍功授武威將軍職居晉寧成化時曰浩遷呈貢始爲文儒活生繡繡生國華皆任儒官國華生祖堯以天啓辛酉選貢任四川名山縣訓導崇禎癸未晉江南太倉州學正甲申國變乙酉南都陷祖堯棄官遯吳郡西山中峯寺依蒼雪法師已仍出寄迹太倉之曇陽庵服僧服食僧食而江浙隱君子與夫婁東子弟舊隸門籍者相從講學不倦求歸不得順治辛丑乃行士大夫多爲歌詩或作圖以送之八月至湖南桃源縣病且聞永曆

帝被執於緬悲痛不食而卒祖堯德粹學純操履嚴正以聖賢爲法挹其言論丰采如坐春風令人自化方訓導名山時刊進修日程以德行問學磨礪多士及蒞太倉捐俸輯黌宮修祀典刊儒學日程日有所記月朔考其進退躬行以率之與陸世儀盛敬陳瑚顧士璉王育陸翼王諸遺老相投契人皆稱爲滇南先生而不名以得延致一飯爲幸及聞其訃則就曇陽庵爲位以哭私謚貞道祖堯所著書曰儒學日程講義十四卷春秋析疑二卷周易闡微四卷南都紀聞二卷俱未梓而佚惟明陽山房詩文六卷離憂集三卷已刊行乾隆中以焚書抽燬今所存者僅有明陽山房遺詩遺文一卷子俊德孫化遠俱有學行俊德見義行傳化遠見文苑傳

雲南叢書呈貢文苑三遺集合鈔

贊曰文祖堯真人師也風概凜如辭色藹如溫良恭儉當前則化去

後則思雖古之大賢何以加茲今其遺著幸而僅存楮墨之間若接  
警歎異代猶興何況當時片羽吉光堪珍視矣其子姓能世其家學  
亦難得哉

### 陶珽雷躍龍傳

陶珽字紫閬號不退姚州人也生有鳳慧而慕孔稚圭之爲人故又  
號稚圭中萬曆辛卯舉人會試不第歸而棄家入雞足山讀書於白  
井庵大覺寺臨摹書法於楞伽室萬曆庚戌應試成進士與傅宗龍  
爲同年友珽登鄉薦赴公車宗龍始生宗龍之父夢年家姪至詰朝  
則珽踵其門珽屢試不第閱十八年而與宗龍同榜初授四川司主  
事二任福建司員外郎三任山西司郎中四任大名府知府五任隴  
右道副使再轉遼東兵備道與經略袁崇煥籌備邊運饟諸大政未

幾改武昌兵備道凡七任皆著聲績致仕歸則建議拓城隍編郡乘  
修學宮周恤族黨講學論文四方從學者屬至築雪閣日研儒先理  
學於其中餘事爲書法宗大米東南萬里之乞書者相望片紙隻字  
遺落人間皆寶若尺璧云珽初未第時嘗客西湖往來江浙與陶望  
齡袁宏道董其昌陳繼儒交所爲詩文海內稱歎著有閬園集纂說  
郭甚淹洽其家所存議事條陳遺稿類皆直言不阿丁明季衰亂之  
時能以剛正自守文采著於後世豈非難能而可貴者哉

姚安  
州志

雷躍龍字伯麟號石庵新興人也先世從沐英征滇留屯新興衛爲  
指揮因家焉穎異特秀讀書過目不忘幼學於同里某翁翁之子與  
躍龍同遊於市遇分守道奇之邀至署試以詩文飲食饋遺有加禮  
焉十歲入邑庠十一食廩餼試輒冠軍十六登萬曆戊午科鄉試聯

捷己未進士選翰林院庶吉士授檢討陞右春坊右贊善歷陞洗馬少詹纂修實錄記注起居充經筵日講官翰林院侍讀學士時魏忠賢有寵於主王公多附之躍龍不與交丁父艱回籍以祖父母老請假養親憂畢赴京師陞禮部右侍郎兼翰林院學士循陞南京左侍郎入賀陞禮部尚書兼翰林院學士教習庶吉士甲申神京失守躍龍屢求死輒爲人解救因間道回滇往元江徵兵謀復舉值流賊孫可望入滇以躍龍名高蹤跡之材官迫就道諮訪一切躍龍力陳匡扶大義乃奉聖駕於安隆帝眷躍龍重其學每呼先生而不名躍龍幼常祈於靜耳之神夜夢見彩霞二字不知所謂大拜後賜食內殿忽見宮額曰彩霞出而歎曰吾殆止於是矣未幾隨駕抵廣通亂兵起遂爲所執送於清師中途疾作而卒辛丑十月二十八日也著有

新纂雲南通志

卷一百九十四 列傳六 明

三

楊文襄傳載在新興州志詩有葵谷草二卷逸餘集一卷文稿散失

無存

雷中撰傳

贊曰陶珽才藻艷逸識度開濟忠言苦諫懇切無諱爲時名臣雷躍龍清慎奉職幹局精練忘身許國慷慨就義孟子有言志士不忘在溝壑勇士不忘喪其元豈不然哉

### 趙炳龍高應雷傳

趙炳龍字文成號雲升晚自署楸園老人劍川人也崇禎壬午舉人研求經世之學工詩古文辭沙定洲寇楚雄金滄道楊畏知用其策擊卻之後永曆帝以畏知薦授戶部員外郎隨蹕至貴州安隆所孫可望既殺畏知又殺吳貞毓等十八人炳龍作歌曰國無同心兮放我江潭居不可卜兮行歌而自憐國無同心兮率我中野虎兕之既

羣兮衣褐皮以爲雅國無同心兮斬我嚶鳴依先民以爲則兮慰羹  
牆之我親又歌失羣四章其詞曰維彼青山石巉巖兮維彼流泉水  
潺湲兮有美一人山水之間兮山之高兮猶可牧兮泉之流兮猶可  
浴兮彼美人兮其不可瀆兮山高而巉草木翳之泉流而潺管絲利  
之嗟美人之信芳兮仇予而將去之匪山必高畏人往還匪泉必流  
畏人激湍匪美人其若仇畏人之中道而棄捐遂歸隱於向湖村之  
楸園鼎革後足跡不履城市吳三桂反脅以僞命避石寶山不出有  
句云誓將棄之去石寶窮厓屢縱我出世心茹君商山芝有子二亦  
解詩炳龍旣老病目收視兩子爲誦詩於側兀坐聽之著有居易軒  
詩文八卷經兵燹燬矣其裔孫聯元搜刻二卷昆明陳榮昌爲滇詩  
拾遺錄四十七首稱其於風騷漢魏六朝三唐並涉其藩籬躋其堂

奧故各體皆佳云

陳榮昌滇詩拾遺

高應雷字澹生昆明人以諸生舉永曆丁酉鄉貢授中書舍人明亡  
應雷隱湖南之溆浦寓大潭舒氏授徒自給十餘年不知所終應雷  
頎而美敏而能強記家饒於貲以讀書結客自喜爲文章瞻捷雲南  
提學黃岡何閔中戶部員外郎劍川趙炳龍皆負時望皆樂與應雷  
遊流賊孫可望入滇平沙定洲之亂遙附永曆帝實持兩端飾弓旌  
以餌士士多景附之應雷獨裹糧出遊足跡遍三迤頗窮山水扼塞  
慨時勢之日非思得一當以報國李定國迎駕至滇授應雷官從軍  
趨黔楚屢有功師潰於辰州應雷獨身跳免迺隱溆浦不復出身世  
之感壹寓於文字間有詩四卷炳龍序之謂如擊燕市之筑鼓雍門  
之琴湘纍澤畔之行吟臯羽西臺之痛哭皆散佚後二百餘年而溆

浦舒立濬鈔存古今體詩百餘首雜文十餘篇以付劍川趙藩應雷弟子多立濬宗人而藩則炳龍裔也因與炳龍遺集合刊之云趙藩撰傳贊曰炳龍之詩度越尋常自明以來蓋罕覩也顧其初志豈僅欲以詩見哉觀其序高應雷詩曰余與澹生平昔相期雅不欲以詩求知於人亦不欲人之僅知其詩然而余且垂垂老矣滄海橫流餘生待盡即澹生意氣消索可知志節所存固第於寥寥是寄矣吁可悲哉乃並此寥寥者亦竟遭兵火之劫僅遺吉光片羽流轉人間何造物之厄斯文也應雷少從學於松華壩及寶珠寺朝夕不離至三年之久既壯留楸園者七閱月兩人詩中相憶之作甚多蓋師友而骨肉矣宜其爲詩有沉澁之通淄澠之合也然炳龍究非應雷之所能及炳龍謂求之授受之末是不知詩然哉然哉

陳佐才傳

陳佐才字翼叔蒙化人負不羈才以世亂習材技隸沐天波標下任一弁已而棄去發憤向學會明亡令官民雍髮不用命者殺無赦佐才獨不垂編髮而裁冠博帶行里閭間顧盼偉然或訐之鎮撫王永祚永祚怒繫佐才至將刑之佐才植立不受挫且責永祚曰爾無以清法繩大明遺民永祚踖踖謝之佐才於是曳杖徐步出官衙滇中人皆曰此義士也佐才喜吟詠其爲集有寧瘦居天叫集是何庵等名暮年鑿石爲棺作詩自挽曰明末孤臣死不改節埋在石中日煉精魄雨泣風號常爲弔客遠近知交以詩贈之佐才悉鐫棺上及卒子孫遵遺囑以石棺殮而葬之滇繫孫仁溶撰傳贊曰國於天地必有與立氣節是也明之亡而東南之士揮戈誓命

以圖光復者多矣即不然而漆室行吟槁饑窮谷之中史不絕書諡曰遺民滇處邊徼雖有風節之士姓名不達於中土佐才者寧非人倫之表式哉

### 武恬康誥傳

武風子恬武定人先世以軍功顯恬性沈靜不謀榮利嗜酒雖貧未嘗一日不沈醉醉輒爲游藝雜技靡不工且巧滇中多產細竹堅栗可爲箸恬以火繪禽魚花鳥山水人物於上前此未有也顧恬獨優爲之以是雙箸之價可供三日糧恬又自矜貴一箸成審諦愛護如拱璧然醉後或痛哭悉投之火醒而悔悔而復作終不輕以易錢也好事每矚其金盡置酒招之酒酣以火與箸雜陳其前而不勸之作恬則攘臂起頃刻完數十箸或於酒醒時以箸相屬恬怒必拂衣去

或遇寒士及黃冠緇衣者告之窮亦忻然爲之於是滇之士大夫相饋遺皆以火繪箸爲重王公貴人遊於滇不得恬所爲箸無以寵歸裝恬固落落一儒冠猶未嘗以風子名也丁亥之歲流賊孫可望敗於蜀竊號於滇恬匿深箐中不出賊於民中見其箸且知其癖也懸賞大索之或繫以來恬殊無一語白眼睨天賊列金帛於左設醇醪於右命作箸不應陳刀鋸以恐之亦不應賊怒鞭而釋之恬於斯時亦未以風子名也未幾而永曆帝入滇被執於緬見弑於吳三桂恬自此病矣日披髮垢形佯狂歌哭行於市夜逐犬豕與臥人逐呼之曰武風子三桂聞風子善爲火繪召之至風子曰昔孫可望一流寇耳與我無隙彼以白刃加我我尙不爲屈況若與我有君國之仇乎手可斷箸不可爲也三桂怒趣斬之縛至市曹風子神色自若或爲

之緩頰亦鞭而釋之自是風子益不可踪跡其火繪益爲時珍祕雖  
千金不易也風子之繪傳者爲凌煙閣功臣像及朱仙鎮奏捷圖崖  
門抱主投海圖箬粗不及筆而旌旗鎧仗侍從車馬城堞樓閣畢具  
其作繪也削炭使銳如針者十數置烈火中煖壺酒於旁伺炭末紅  
起之左執箬右執炭疾若風雨且飲且作酒盡則止注滿乃復作飲  
不用杯杓輒以口就壺醉則傍爐而臥或哭或歌或說論語五經書  
多創解酒醒而問之則皆嚙語或醉爲詩詩未成忽不知所往越數  
十日或數月忽復來卒成之其狀貌如恆人年逾六十拜揖跪起無  
異狀惟與之語則風矣然而風子卒抱其絕藝以隱於風不知其所  
終

方亨咸撰傳

康誥昆明人每出皆著破鞬故人稱爲康破鞬無妻子獨處一室好

新纂雲南通志

卷一百九十四 列傳六 明

七

讀書性嗜酒有招之飲者即至于以錢米不受善洞簫書學祝允明  
居嘗以玉屑和泥置袖中團弄陶作硯堅潤類銅雀瓦人重之名康  
硯然不可多得閒爲一二以貽親識好事者日與之飲俟醉索之或  
伺其窘急出質則得質必故交或文人墨客若富家貴族雖購以重  
價不售也

康熙志

贊曰武恬剛簡絕俗藝思通神垢形毀容自全亂世觀其固拒逆命  
義形於色刀鋸在前確然不動可謂勇矣康氏行與武類擅絕技亦  
相同世並稱武箬康硯顧傳者不詳其家世惜哉要皆孔子所云古  
之狂者也

### 郝太極傳

郝太極晉寧人明天啟初以軍功官霑益州守備五年巡撫閔洪學



檄烏撒安効良縛獻安應龍以自贖効良睹賊勢衰陽爲歸順遂以應龍首及烏撒衛所各印來獻勞其使而歸之行抵曲靖遇盜被殺効良忿甚因以殺使爲辭糾安邦彥奢崇明等直抵霑益總兵袁善督太極及宣撫沙源等力戰五晝夜卻之五月効良復糾水西賊大舉入寇洪學檄布政使謝存仁督善與太極等大敗之馬龍州由尋甸遁歸太極之功爲多國變後憤永曆之西狩也隻身逃入吳中隱其名於蘇州閭門外上津橋設藥攤專售各種內外傷藥及藥膏自活太極術精而心仁凡貧病者輒免其藥直且爲之診治歲愈病人無算不受人報人感其德叩其姓名則笑而不答堅叩之終不吐髮班白長鬚飄拂頰下森森如鐵戟雙目光閃爍照人額上橫紋深刻似飽經憂患也者無他嗜惟喜飲酒薄暮收攤則至酒家獨酌以花

生米爲下酒物醉後輒仰天悲嘆一若胸蘊無限憾事者然一夕大醉無意中露其姓曰夏顧他事不及一言橋畔有大樹百餘年物也倏爲大風所摧折橫臥於道礙人足居戶集少壯者七八人欲舁之去力竭而未能笑曰此易易事何勞多人爲遂隻手挽之疾行至曠野拋之曰盍加斧斤可供數月薪也衆愕然變色益奇之多方探索始悉其非姓夏真姓名爲郝太極並語所以入吳中賣藥之故謂永曆不能背城一戰也一時賢士大夫咸禮重之時年過耳順而雄心未減壯志猶存酒酣言及明亡事則雙淚垂流不能仰慈祥愷惻醫術尤精外科僉稱爲華扁再世及歿禮葬上津橋之南境吳縣知縣合江李超瓊修其墓植冬青百餘株令邑人士保護之並樹石橋畔

曰故明郝將軍賣藥處云

倪蛻滇雲歷年傳 曹樹翹滇南雜誌 顧亭林詩集 道光志戎事志 顧明道虎嘯龍吟錄

贊曰明之亡也太極不覲顏以事新朝隱醫吳中爲吳中人士所禮重顧炎武贈以詩曰曾提一旅制黔中水閣諸酋指顧空入楚廉頗猶未老過秦扁鵲更能工風高劍氣蛉川外水沸茶聲鶴澗東橋畔相逢不相識漫將方技試英雄嗚呼可以知太極之爲人矣

### 孫興可童繆甲傳

孫興者世籍不可考爲曲靖孫氏先祖仕平越者之侍僕生有至性喜聞節義事崇禎甲申之變其主聞之大慟興乘間請曰主何憂之深也有可語僕而爲之解者乎則應曰吾職在守土與城爲存亡顧孤城無援而寇氛甚惡死吾職也但念先人宗祀不能無恫於心耳興奮然曰主人有職效死興豈獨無職乎保孤存祀此真興今日職也請效死爲之居常所聞古節義事豈耳聞之已哉固將身踐之主

人視興果何如者其主曰誠如是吾宗祀賴汝矣吾有執友王公國正見爲安順府二尹吾以長子思賢付汝汝挈以往依之興曰諾立負思賢行至則王子視思賢而友視興退語人曰此義士也孫氏何幸而得之亡何流賊孫可望陷平越其主率家人死之王告以故並以女妻思賢託之而趣其行興又奮然曰始吾受一主人託吾職已重矣今受兩主人託吾職不更重乎然直任之而不辭者非吾力足以當之亦惟吾職之務盡且要諸死之日與兩主人好相見也於是遂行至曲靖居久之爲思賢成家室興亦娶婦生子子有材勇入伍隨總兵官王某至臨安積功得官興就養子任以卒年八十

孫光庭撰傳

可童鎮雄人明末胡氏僕其主爲賊所殺可童藏幼主登魁於竹笥負以逃賊追及童張弩向之曰我胡家窮僕也追我何爲賊舍之遂

負登魁匿四川敘州府撫之成立卒報父仇

嘉慶重修  
一統志

繆甲者其本姓及名均不詳崇禎時爲今宣威舊威寧庠生繆士昇之家僕丁亥四月流寇李定國至曲靖合家避兵邑之東山皆罹難死士昇之子淑以落箐獨存年才十二耳旣歸故居老僕持之慟家事無大小身任之惟勛淑入塾勤讀偶怠則自責時有鋪站丁伋役僕曰不勤讀應爲役矣旣往已竊尾其後未數里淑以不勝泣僕曰叔爺肯立志讀書否淑應諾僕乃代之淑以此奮發得列膠庠於是由城移居城西七里之老堡冲有族某早覬其產至是欲加害僕侍淑入城遇諸途奮身捍蔽得免淑之子孫德之不敢斥其名後遂無知其姓名者從主姓稱之曰繆甲云爾其遺塚在所居村後淑之八世孫始爲立碑其文有云天地晦盲際隳節歎士夫或則甘賣主或則頓欺孤詎料臧獲中能將正氣扶蓋其德義淪浹於淑之子孫者深矣

探訪

### 釋普荷讀徹傳

釋普荷一名通荷號擔當晉寧人俗姓唐氏名泰字大來其先世浙江淳安人始遷祖宗勝明洪武中謫戍晉寧未行而卒子二曰瑤曰環皆長於詩宗勝旣卒瑤例當代戍環憫其兄之孤往也奉母扶父櫬與偕行居數載瑤以疾亡環哀痛竟喪其身環子以恭以恭子佑

諸生生子金嘉靖戊子舉人官邵武府同知祀名宦子堯官字廷俊號五龍山人領嘉靖辛酉解屢不第春闈杜門著書有五龍山人集行世子懋德字世修號十海萬曆癸卯舉人官陝西臨洮同知祀名宦著十海詩集即普荷父也普荷年十三補博士弟子員天啓中以明經入對大廷嘗受書畫於大宗伯董其昌訪陳繼儒於雲間繼儒曰此當世磊落奇男子也以母老繳引歸值貴筑亂道梗紆道出嶺右繭足萬里過會稽參雲門湛然面受禪旨普荷先嘗在江南與鄉人蒼雪法師遊而江南徐宏祖繼儒友也遍遊天下名山水後至滇訪普荷知其窮贈金爲別普荷未嘗無用世之志也居恆慷慨談治平精悍之色見眉宇格不得施而中原亂母郭氏棄養而明祚亡悲慨無所寄乃浩然棄家參水目山無住和尚受戒律往來雞足點蒼

間猶與蒙化陳翼叔佐才浪穹何稚元蔚文劍川趙雲升炳龍及閩人許子羽鴻歛縣汪宸初蛟遊處及唱酬甚洽今雞足山寶蓮庵點蒼感通寺沙門往往稱普荷清修處云普荷爲儒生時著有脩園集而檄庵草拈花頌百韻罔措齋頌古皆出世後作也普荷雖受戒於無住而實嗣雲門衣鉢得正法眼藏且曰世有儒名而佛行者洪覺範是也湛然雲門獨佛名而儒行故偈頌中每得風雅遺意清康熙癸丑孟冬示微疾十有九日晨起端坐辭衆因說偈曰天也破地也破認著擔當便錯過舌頭已斷誰敢坐泊然而化距生於萬曆癸巳三月十二日世壽八十有一瘞於斑山而塔之

方樹梅撰傳

讀徹初字見曉後更字蒼雪姓趙氏呈貢人父碧潭中年棄家爲浮屠讀徹性敏穎隨父祝髮於昆明妙湛寺稍長至雞足山寂光寺爲

水明大師侍者管書記年十九慨然躡屨行萬里叩印楞嚴於天衣受十戒於雲棲受滿分戒於古心律師聞雪浪晚棲蘇州之望亭往參焉浪沒巢松浸開講甘露寺讀徹敝衣下坐嘗一夕賦詩驚衆聽嗣詣鐵山受一雨禪師衣鉢與汰如並爲入室弟子讀徹以爲華嚴一經經王法海非精研疏鈔不能涉津涘窮奧窅迺與汰如訂分講之約汰住吳郡華山讀徹住中峯一歲二期兩山對峙梵唄之聲相應東南法席斯爲盛矣未幾汰如化去讀徹遂獨力荷擔講演諸經豐次開壇雖病弗輟道風凜然詩名亦藉甚與文震孟姚希孟周茂蘭徐波吳偉業王士禎友善大興道場咸謂慈恩皎然復生丙申夏寶華山見月請講楞嚴老病人扶登座開題圓音落落實至二卷末命弟子代講病遂不起作遺誡詩十章又作辭世偈曰我不修福不生

天上我不作罪不墮地下還來人間生死不怕有一寶珠欲求善價別開鋪面娑婆世界端坐而逝時順治十三年閏五月廿二日也世壽六十有九見月護龕歸葬塔在中峯寺後二百步錢謙益爲之銘讀徹面目刻削神觀凝粹博涉內外典賦詩多禪理有南來堂集四

卷

秦光玉撰傳

贊曰普荷讀徹文質秀拔矯矯才望逢國多故淪跡緇流將其憤時疾邪寄慨無地有激而云然哉夫君子得其時則騰駕千里不得時則蓬累而行出處有時顯晦有命是以身名俱泰而悔吝不逢跡二子之行事豈徒異夫世俗斗筭之徒固將賢於捐忿自沈者之所爲高風遐躅復乎尙已